

ANEXO II

Marxes brutas das principais actividades produtivas gandeiras das explotacións (valor en euros/unidade)

Actividade	Unidades	Características	Pdto. bruto	G. variable	Marxe bruta
Cabrún	Nai	Sen primas	102,17	9,62	92,56
Ovino	Nai	Con primas	90,15	9,62	80,54
Ovino	Nai	Sen primas	60,10	9,62	50,49
Vacún carne	Cab	Dereitos+prima exten.	1.144,72	358,73	785,99
Vacún carne	Cab	Con dereitos	1.044,72	358,73	685,99
Vacún carne	Cab	Sen dereitos	857,04	358,20	498,84
Vacún leiteiro	Litros/cota/ano	<50.000 l. expl.	0,32	0,15	0,17
Vacún leiteiro	Litros/cota/ano	De 50.001 a 100.000	0,32	0,14	0,18
Vacún leiteiro	Litros/cota/ano	>100.000	0,34	0,15	0,19
Xatos ceba	Praza (1,25 xato)	0-9 meses	854,19	628,81	225,38
Xatos ceba	Praza (1,25 xato)	Con prima	1.054,19	628,81	425,38
Xatos ceba	Praza (1,25 xato)	Prima+prima extens.	1.179,19	628,81	550,38

Os cálculos para a determinación dos importes das compensacións faranse multiplicando o valor en euros da marxe bruta de cada unidade de produción polo número de unidades de produción que consten como datos oficiais referidos á explotación afectada na Consellería do Medio Rural. Resultará así un importe anual que dividido por 365 días determinará o importe diario que, pola súa vez, será multiplicado polo número de días de inactividade.

En caso de recuperación parcial da actividade serían descontados, para os días restantes, os importes das unidades de produción correspondentes.

Para os casos en que o período de inactividade supoña a perda de posibilidade de percepción do importe total da prima anual, aplicarase para o cálculo o valor de marxe bruta sen prima e incrementarase o importe final co valor total anual da prima.

Orde do 11 de marzo de 2008 pola que se regulan e se convocan axudas para a compra de gando bovino e ovino-cabrún que teña por obxecto a reposición das reses como consecuencia do sacrificio obrigatorio en execución dos programas de control e erradicación de enfermidades dos animais.

O Real decreto 2611/1996, do 20 de decembro, polo que se regulan os programas nacionais de erradicación de enfermidades dos animais (BOE nº 307, do 21 de decembro), establece no seu artigo 2 as enfermidades que estarán sometidas a control oficial en programas nacionais de erradicación.

Nos artigos 15, 16 e 17 deste real decreto dispónse o sacrificio obrigatorio dos animais reaccionantes positivos a algunha destas enfermidades e o dereito a percibir indemnizacións como consecuencia desa obrigatoriedade de sacrificio deses animais.

Con todo, as indemnizacións establecidas son insuficientes para paliar as importantes perdas económicas dos produtores, sobre todo naquelas explotacións en que se fai un baleiro sanitario total por sacrificio preventivo e destrución de todos os seus animais, que, ademais, teñen que sufrir un período de inactividade produtiva ata que os servizos veterinarios oficiais

autoricen novamente a reintrodución de animais novos nesa explotación.

Así, aínda que a Lei de sanidade animal reconece expresamente o dereito do dono do animal a ser indemnizado polo dano causado ao sacrificar os animais, a aplicación dos métodos de valoración existentes na actualidade non é proporcional á deterioración patrimonial que efectivamente se produce porque se lle impide producir durante un período de tempo e, en moitos casos, constitúe o seu medio de vida, polo que, unha vez declarada a enfermidade se produce, na práctica, unha situación de grave desamparo e indefensión. Estes feitos poden poñer en perigo a viabilidade económica destas explotacións.

Consecuentemente co exposto anteriormente, faise imprescindible establecer os mecanismos de reparación e rescamento dos danos realmente causados ao propietario ante o establecemento de medidas obrigatorias como consecuencia dun programa de prevención e erradicación de enfermidades dos animais, das cales en ningún caso se pode facer responsable o propietario da explotación.

Ademais, hai que ter en conta a dificultade con que se atopa o produtor para poder repoñer os animais de similares características aos que se lle obrigou a sacrificar, e que na maior parte dos casos non hai posibilidade de alcanzar a reposición total ao mesmo tempo.

Polo tanto, para aqueles casos en que coas indemnizacións por sacrificio obrigatorio non se acada o valor de adquisición de novos animais similares aos sacrificados e consecuentemente non resultaría factible repoñer eses animais, considérase necesario establecer axudas para favorecer a reposición de gando sacrificado obrigatoriamente.

Na súa virtude, de conformidade co disposto no artigo 30.1.3 do Estatuto de autonomía de Galicia, e en uso das facultades que me confire o artigo 14 da Lei 9/2007, do 13 de xuño, de subvencións de Galicia, así como en uso das competencias que me confire a Lei 1/1983, do 22 de febreiro, modificada pola Lei 11/1988, do 20 de outubro, reguladora da Xunta e da súa Presidencia,

DISPOÑO:**Artigo 1º.-Obxecto.**

Establécense axudas aos titulares de explotacións de gando bovino, ovino e cabrún para a compra de animais da citada especie que teña por obxecto a reposición de efectivos naquelas explotacións en que se ordene o sacrificio de animais das especies bovina, ovina e cabrúas existentes nela, tras a realización do diagnóstico dunha das enfermidades sometidas a un programa oficial de erradicación.

Artigo 2º.-Beneficiarios.

Poderán acceder a estas axudas as persoas físicas ou xurídicas, titulares de explotacións de gando nas que se ordenara o sacrificio obrigatorio de bovinos, ovinos ou cabrúns existentes na explotación como consecuencia do diagnóstico dunha das enfermidades sometidas a un programa oficial de erradicación.

O artigo 10 do Regulamento (CE) nº 1857/2006, da Comisión do 15 de decembro de 2006 (DO L 358, do 16 de decembro), sobre aplicación dos artigos 87 e 88 do tratado ás axudas estatais para pequenas e medianas empresas dedicadas á produción de produtos agrícolas e polo que se modifica o Regulamento (CE) nº 70 /2001, establece que estas axudas destinadas a compensar os agricultores polos custos de prevención de enfermidades de animais serán compatibles co mercado común e quedarán exentas da obriga de notificación (conforme o número 3 dos artigos 87 e 88).

Artigo 3º.-Requisitos dos beneficiarios.

Para poder ter dereito ás axudas establecidas nesta orde, é imprescindible o cumprimento estrito da normativa en vigor sobre epizootias, programas de erradicación de enfermidades animais e a relativa á vixilancia epidemiolóxica das encefalopatías esponxiformes transmisibles. Esta normativa recóllese na Lei 8/2003, do 24 de abril, de sanidade animal; Regulamento de epizootias do 4 de febreiro de 1995; Real decreto 2611/1996, do 20 de decembro, polo que se regulan os programas nacionais de erradicación das enfermidades dos animais; Regulamento (CE) 999/2001, do Parlamento Europeo e do Consello, referente á vixilancia epidemiolóxica e aos controis das encefalopatías esponxiformes transmisibles e ás súas posteriores modificacións; Regulamento (CE) 1774/2002, do Parlamento Europeo e do Consello, polo que se establecen as normas sanitarias aplicables aos subprodutos animais non destinados ao consumo humano; e en todas aquelas normas de desenvolvemento en materia de sanidade animal. Especialmente serán comprobados pola Administración os seguintes requisitos:

-En todos os casos, ter sacrificado obrigatoriamente aqueles animais de especies susceptibles de padecer a enfermidade e que foron diagnosticados positivos.

-Ter efectuado, previamente á reposición dos animais, a limpeza e desinfección da explotación de acordo coa lexislación vixente e as instrucións da autoridade competente.

-Non estar en ningún dos seguintes supostos establecidos no artigo 22 da Orde do 4 de abril de 1997 pola que se establecen as normas para desenvolvemento das campañas de saneamento gandeiro das especies bovina, ovina e cabrúa:

a) Que aparezan na corte reses bovinas, ovinas e/ou cabrúas sen identificar, non existindo causa xustificada para isto.

b) Que existan mostras de manipulación na documentación sanitaria e/ou marcas de identificación.

c) Que a totalidade das reses non foi sometida a campañas nos anos anteriores tendo idade para isto.

d) Que exista evidencia de calquera manipulación que poida alterar a fiabilidade dos resultados nas probas prácticas ou laboratoriais.

e) Que se vendesen ou adquirisen animais quebrantando a inmovilización sinalada no artigo 13 desta orde, ou se incorporase á explotación algún animal que non proceda de explotación calificada sanitaria-

mente, se descoñeza a súa orixe ou careza de acreditación sanitaria suficiente.

f) Que o sacrificio se leve a cabo en lugares ou matadoiros non autorizados ou nos situados fóra de Galicia sen autorización previa para o traslado.

g) Que non se sacrifiquen todas as reses positivas no prazo de trinta días naturais a partir da data da marcación coa T ou de notificación da positividade.

h) Que a corte se atope nun estado de deficiente hixiene e desinfección ou non cumpra coas normas técnicas que en cada caso se establezan.

i) Que non se declare a incorporación dos animais procedentes doutras explotacións no prazo e condicións establecidas nesta orde.

Artigo 4º.-Requisitos dos animais adquiridos.

1. Os animais da especie bovina obxecto de subvención procederán de explotacións con cualificación sanitaria T3 e B4 e libre de encefalopatías esponxiformes transmisibles.

2. Unicamente será subvencionable a reposición efectuada con animais destinados á reprodución correctamente identificados, para manter na explotación un nivel de produción similar ao existente con anterioridade ao sacrificio, e cunha idade comprendida entre 20 meses e 4 anos para gando de aptitude láctea e entre 20 meses e 6 anos para o de aptitude cárnica. Os ovinos e cabrúns de entre 7 meses e 5 anos.

En caso de que a reposición se efectúe mediante a substitución dun rabaño completo o 70% dos seus animais deberán estar comprendidos neses tramos de idade, e do 30% restante serán subvencionables só os animais que estean comprendidos entre os 8 meses e os 6 anos de idade, se son de aptitude láctea e entre 8 meses e 9 anos se son de aptitude cárnica.

Artigo 5º.-Clase e contía das axudas.

1. As axudas para a compra de animais destinados á reposición considerados nesta orde poderán concederse nas contías e cos límites seguintes:

-Cincocentos euros (500 euros) por animal adquirido da especie bovina, e cincuenta euros (50 euros) no ovino-cabrún, nos casos de baleiro sanitario nunha explotación, importe que será incrementado nun 10% se pertence a unha ADS, ata un máximo de 24.000 euros por beneficiario.

-O 75% do importe citado no primeiro punto por cada animal adquirido nos casos en que non se realiza baleiro total da explotación, ata un máximo de 12.000 euros por beneficiario.

-Ademais do establecido nos puntos anteriores, poderá concederse unha contía adicional nos casos seguintes:

* Se os animais sacrificados pertencen a explotacións incluídas en núcleos de control leiteiro, nun importe por animal igual ao resultado de multiplicar:

0,15 euros polos quilos de leite resultantes de aplicar a diferenza entre o rendemento leiteiro medio de, polo menos, o 60% das femias da explotación con maior rendemento e a cantidade de 6.700 quilos.

* Se os animais sacrificados pertencen a unha raza cárnica e están inscritos no libro xenealóxico da cita-da raza poderase engadir unha contía adicional de:

150 euros en vacas menores de 10 anos cualifica-ción morfolóxica de 75 a 79 puntos.

300 euros en vacas menores de 10 anos cualifica-ción morfolóxica de 80 a 84 puntos.

450 euros en vacas menores de 10 anos cualifica-ción morfolóxica máis de 85 puntos.

Aplicaríase a cualificación morfolóxica que figure na carta do animal.

Nestes últimos casos o límite máximo por beneficia-rio será de 36.000 euros.

-En todo caso, o límite máximo do importe da axu-da por cada animal reposto será a diferenza entre o valor de adquisición do animal novo e a suma do importe da indemnización polo sacrificio do animal substituído e o valor obtido na súa comercialización.

2. O número de reses obxecto da axuda non poderá ser superior, en ningún caso, ao dos animais repro-ductores que figuren asignados a esa explotación na base de datos oficial da Consellería do Medio Rural e que fosen obxecto de sacrificio obrigatorio, entendéndose como tales os animais bovinos de máis de dous anos, e os de menos de dous anos que parisen antes desa idade, e que teñan menos de dez anos de idade nos de aptitude leiteira e quince anos nos de aptitude cárnica. Os ovinos e cabrúns de máis dun ano, e os de menos dun ano que parisen antes desa idade, e que teñan menos de cinco anos de idade.

Artigo 6º.-*Solicitudes, prazos e documentación.*

As solicitudes, segundo o modelo que figura como anexo I desta orde, poderán presentarse nas oficinas da Consellería do Medio Rural así como nos demais lugares e formas previstos no artigo 38.4º da Lei 30/1992, do 26 de novembro, de réxime xurídico das administracións públicas e do procedemento administrativo común, e no Decreto 164/2005, do 16 de xuño.

O prazo de presentación de solicitudes será desde o día seguinte ao da data de publicación desta orde ata o 21 de novembro do ano 2008, incluída esta data no cómputo do prazo.

Coa solicitude achegarase a seguinte documenta-ción:

-NIF do solicitante no caso de persoas físicas e CIF cando se trate de persoas xurídicas.

-Certificado da entidade bancaria acreditativo de que a conta citada na solicitude para a domiciliación dos pagamentos lle corresponde ao solicitante.

-Facturas pagadas, ou documento equivalente, que acrediten a compra das reses polas que se solicita a axuda.

-Valor obtido na comercialización do animal.

-Xustificantes do importe percibido polas canais de animais que foron obxecto de comiso no matadoiro.

-No caso de ser unha explotación incluída no núcleo de control leiteiro, certificación que acredite os ren-dementos medios obtidos polo rabaño correspondente ás lactacións válidas e finalizadas.

-No caso de que os animais sacrificados fosen de raza cárnica e estivesen inscritos no libro xenealóxico da raza, copia cotexada da carta xenealóxica dos ani-mais sacrificados en que figure a cualificación morfo-lóxica.

-No caso de persoas xurídicas, copia compulsada do documento de constitución da sociedade e dos estatutos e certificado expedido polo órgano xestor da socie-dade en que conste o acordo de solicitar a axuda e a identidade da persoa autorizada para solicitala.

-De acordo co establecido na disposición adicional primeira do Decreto 132/2006, do 27 de xullo, de creación dos rexistros de axudas, subvencións e con-venios e de sancións da Xunta de Galicia, a persoa solicitante da axuda consentirá expresamente a inclu-sión e publicidade dos datos relevantes referidos as axudas e subvencións recibidas, así como ás sancións impostas, de ser o caso.

Se a solicitude non reúne os requisitos sinalados nos puntos anteriores, os servizos provinciais de gan-daría requirirán o interesado, na forma establecida na Lei 30/1992, do 26 de novembro, para que nun prazo de dez días emende a falta ou achegue os documentos preceptivos, coa indicación de que, se así non o fixe-se, se considerará que desistiu da súa petición, des-pois de ditada a resolución para o efecto.

Artigo 7º.-*Tramitación e resolución.*

Os servizos provinciais de ganaría remitiranlle á Dirección Xeral de Producción, Industrias e Calidade Agroalimentaria o seu informe sobre as solicitudes presentadas. A tramitación das axudas correspóndel-le ao director xeral de Producción, Industrias e Calida-de Agroalimentaria, que elevará a correspondente proposta de resolución ao conselleiro de Medio Rural, a quen lle corresponde a resolución das axudas.

Poderán resolverse as solicitudes de axuda a medi-da que se vaian presentando conforme o previsto no artigo 19.2º da Lei 9/2007, do 13 de xuño, de subven-cións de Galicia.

Contra a resolución que dite o conselleiro do Medio Rural poderase interpoñer recurso. A Dirección Xeral de Producción, Industrias e Calidade Agroalimentaria é o órgano competente para a tramitación das axudas reguladas e convocadas nesta orde, despois do infor-me técnico das solicitudes polos servizos provinciais de Gandaría. Emitirase resolución do conselleiro do Medio Rural de aprobación ou denegación da axuda, en que se especifiquen os recursos que procedan. Contra a resolución que dite o conselleiro do Medio Rural poderase interpoñer recurso potestativo de reposición no prazo dun mes contado desde o día seguinte ao da notificación daquela. A resolución notificarase na forma prevista no artigo 59 da Lei 30/1992, do 26 de novembro, de réxime xurídico das administracións públicas e do procedemento admi-nistrativo común, modificada pola Lei 4/1999, do 13 de xaneiro.

Poderán entenderse desestimadas as solicitudes non resoltas nun prazo de seis meses contados desde a súa data de presentación. Transcorrido o devandito prazo, o interesado dispón de tres meses para interpo-

ñer recurso potestativo de reposición ante o conselleiro do Medio Rural.

Cabe interpoñer directamente recurso contencioso-administrativo ante o órgano xurisdiccional contencioso-administrativo competente, no prazo de dous meses, contados a partir do día seguinte ao da notificación da resolución, se é expresa; ou de seis meses, contados a partir do día seguinte a aquel en que se produza o acto presunto, de acordo co previsto na Lei 29/1998, do 13 de xullo, reguladora da xurisdición contencioso-administrativa.

A resolución de concesión poderá ser modificada en caso de alteración das condicións que se tiveron en conta para a concesión da subvención ou, en todo caso, pola obtención concorrente da axuda e subvención outorgadas por outras administracións ou entes públicos ou privados, nacionais ou internacionais.

Artigo 8º.-*Xustificación e pagamento.*

O pagamento da subvención realizarase dunha soa vez, logo de comprobación do cumprimento dos requisitos establecidos nos artigos anteriores e comprobada a reposición efectiva.

Os beneficiarios presentarán antes do pagamento unha declaración complementaria do conxunto das axudas, tanto as aprobadas ou concedidas como as pendentes de resolución das distintas administracións públicas competentes ou calquera dos seus organismos, entes ou sociedades.

De acordo co artigo 20 da Lei 9/2007, do 13 de xuño, de subvencións de Galicia, a presentación da solicitude de concesión de axuda polo interesado comportará a autorización ao órgano xestor para solicitar as certificacións que deban emitir a Axencia Estatal da Administración Tributaria, a Tesouraría Xeral da Seguridade Social e a Consellería de Economía e Facenda da Xunta de Galicia.

Non obstante, quedarán exentos da xustificación do cumprimento das obrigas establecidas no parágrafo anterior os beneficiarios das axudas que non superen un importe de 1.500 euros, segundo o previsto no artigo 45 un g) da Lei de orzamentos xerais da comunidade autónoma para o ano 2008.

Artigo 9º.-*Compatibilidade das axudas.*

As subvencións reguladas por esta orde serán compatibles con calquera outra que se poida obter das distintas administracións para a mesma finalidade, pero o importe conxunto de todas non poderá superar a diferenza establecida no parágrafo final do número 1 do artigo 5º.

Artigo 10º.-*Controis.*

A Consellería do Medio Rural poderá realizar os controis administrativos e inspeccións que considere oportunos co fin de comprobar a veracidade dos datos consignados na documentación presentada, así como o cumprimento dos requisitos para a percepción da axuda. O beneficiario estará obrigado a colaborar na citada inspección, proporcionando os datos requiridos e facilitando, se é o caso, o acceso á explotación.

O beneficiario ten a obriga de facilitar toda a información que lle sexa requirida polo órgano xestor, así

como pola Intervención Xeral da Comunidade Autónoma, o Consello de Contas e o Tribunal de Contas no exercicio das súas funcións de fiscalización e control.

Artigo 11º.-*Incumprimento e reintegro.*

O incumprimento polo beneficiario de calquera das condicións establecidas nesta orde dará lugar á perda do dereito á subvención e á devolución, se é o caso, das cantidades indebidamente percibidas, sen prexuízo doutras responsabilidades a que houber lugar (artigo 33 da Lei 9/2007, do 13 de xuño, de subvencións de Galicia).

Artigo 12º.-*Financiamento.*

As axudas establecidas nesta orde aboaranse con cargo á aplicación orzamentaria 11.03.713-E.770.3 Programas sanitarios especiais, dos orzamentos xerais da Comunidade Autónoma de Galicia para o ano 2008, para o que se destina inicialmente un importe de 440.000 euros, este importe poderá ser incrementado na medida necesaria para que poidan ser atendidas todas as solicitudes recibidas conforme o previsto no artigo 31.2º da Lei 9/2007, do 13 de xuño, de subvencións de Galicia.

En todo caso a concesión das axudas quedará condicionada á existencia de crédito axeitado e suficiente.

Disposición adicional

Nos aspectos non contados nesta orde, terá que aterse ao disposto no artigo 14 da Lei 9/2007, do 13 de xuño, de subvencións de Galicia, e no Decreto 287/2000, do 21 de novembro, polo que se desenvolve o réxime de axudas e subvencións públicas da Comunidade Autónoma de Galicia, e na Lei 38/2003, xeral de subvencións.

Esta orde está suxeita a comunicación a Unión Europea e ao pagamento das axudas quedará en todo caso condicionado a que os órganos competentes da Unión Europea adopten unha decisión de non formular obxeccións a estas, ou declarasen a subvención compatible co mercado común, e as posibles observacións e modificacións derivados de tal pronunciamento.

De acordo co establecido na disposición adicional primeira do Decreto 132/2006, do 27 de xullo, de creación dos rexistros de axudas, subvencións e convenios e de sancións da Xunta de Galiza, a persoa solicitante da axuda consentirá expresamente a inclusión e publicidade dos datos relevantes referidos ás axudas e subvencións recibidas, así como ás sancións impostas, de ser o caso.

Disposicións derradeiras

Primeira.-Facúltase o director xeral de Produción, Industrias e Calidade Agroalimentaria para ditar as disposicións necesarias para o desenvolvemento e cumprimento desta orde.

Segunda.-Esta orde entrará en vigor o día seguinte ao da súa publicación no *Diario Oficial de Galicia*.

Santiago de Compostela, 11 de marzo de 2008.

Alfredo Suárez Canal
Conselleiro do Medio Rural



XUNTA DE GALICIA
CONSELLERÍA DO MEDIO RURAL

ANEXO

PROCEDEMENTO AXUDAS Á REPOSICIÓN DE ANIMAIS: XERAL	CÓDIGO DO PROCEDEMENTO MR550A	DOCUMENTO SOLICITUDE
--	---	--------------------------------

DATOS DO/A SOLICITANTE

EMPRESA / ENTIDADE				CIF	
ENDEREZO		LOCALIDADE		PROVINCIA	
CONCELLO	CÓDIGO POSTAL	TELÉFONO	FAX	ENDEREZO ELECTRÓNICO	

E, na súa representación:

APELIDOS		NOME		DNI	
ENDEREZO		LOCALIDADE		PROVINCIA	
CONCELLO	CÓDIGO POSTAL	TELÉFONO	FAX	ENDEREZO ELECTRÓNICO	

DATOS BANCARIOS

CÓDIGO DO BANCO	CÓDIGO DA SUCURSAL	DÍXITOS DE CONTROL	CÓDIGO DA CONTA
NOME		ENDEREZO (RÚA E NÚMERO)	
PROVINCIA		POBOACIÓN	CÓDIGO POSTAL

DOCUMENTACIÓN QUE SE XUNTA

☐ NIF OU CIF.
☐ CERTIFICADO DA CONTA BANCARIA.
☐ FACTURAS DE COMPRA OU DOCUMENTO EQUIVALENTE.
☐ XUSTIFICANTES DO VALOR ECONÓMICO DAS CANAIS DOS ANIMAIS SACRIFICADOS OU XUSTIFICANTES DE DESTRUCCIÓN DAS CANAIS COMISADAS.
☐ XUSTIFICANTE DE RENDEMENTOS LEITEIROS OU DE CUALIFICACIÓN MORFOLÓXICA CÁRNICA.
☐ ACTA DE CONSTITUCIÓN DA ENTIDADE, DE SER O CASO.
☐ VALOR OBTIDO NA COMERCIALIZACIÓN DO ANIMAL.
☐ EN CASO DE REPRESENTACIÓN: AUTORIZACIÓN PARA FACER A SOLICITUDE AO ASINANTE DA CERTIFICACIÓN DO ÓRGANO COMPETENTE EN QUE SE ACREDITE O DESEMPEÑO ACTUAL DO CARGO, DE SER O CASO.
☐ DECLARACIÓN DE AXUDAS.

O que abaixo asina solicita que lle sexa concedida a axuda establecida na Orde do _____ da Consellería do Medio Rural e consinte expresamente a inclusión e publicidade dos datos relevantes referidos ás axudas e subvencións recibidas, así como as sancións impostas de ser o caso (Decreto 132/2006, do 27 de xullo).

LEXISLACIÓN APLICABLE <i>Orde do 11 de marzo de 2008 pola que se regulan e convocan axudas para a compra de gando bovino e ovino-cabrán que teña por obxecto a reposición das reses como consecuencia do sacrificio obrigatorio en execución dos programas de control e erradicación de enfermidades dos animais.</i> SINATURA DO/A SOLICITANTE OU PERSOA QUE O REPRESENTA _____, de _____ de _____ <i>Conselleiro do Medio Rural</i>	(Para cubrir pola Administración) <table border="1"> <tr> <td>RECIBIDO</td> <td rowspan="3"> NÚMERO DE EXPEDIENTE _____ DATA DE ENTRADA ____/____/____ DATA DE EFECTOS ____/____/____ DATA DE SAÍDA ____/____/____ </td> </tr> <tr> <td>REVISADO E CONFORME</td> </tr> <tr> <td></td> </tr> </table>	RECIBIDO	NÚMERO DE EXPEDIENTE _____ DATA DE ENTRADA ____/____/____ DATA DE EFECTOS ____/____/____ DATA DE SAÍDA ____/____/____	REVISADO E CONFORME	
RECIBIDO	NÚMERO DE EXPEDIENTE _____ DATA DE ENTRADA ____/____/____ DATA DE EFECTOS ____/____/____ DATA DE SAÍDA ____/____/____				
REVISADO E CONFORME					